



БҮГІНГІНІҢ БАС ТАҚЫРЫБЫ

БҰЛ АЙДА ӨШПЕС СӘУЛЕ БАР...

Ей, намыстың найзағайдай ұлдары,
Қызыл тілін қылыш еткен қыздары!
Қанды тарих қалшыып тұр мәңгіге,
Жанарында – Желтоқсанның ызғары.
Айтулы Желтоқсан оқиғасының бұл сипаты күллі қазақтың азаттық жолындағы елеулі шайқастарының суретін беріп тұрғандай. Алаш жұртының әу бастағы арманы – тәуелсіздік, азаттық еді. Ал, ол азаттық Ұларбек ақын жырлағандай намысты ұлдар мен қайсар қыздардың арқасында келді. Тәуелсіздік пен Желтоқсанның қазақ үшін егіз ұғым есебінде жүруі де осыдан. Кез келгеннің көкірегіне мақтаныш ұялататын да, намысын қайрап ашуға мінсе атойлататын да Желтоқсан. «Ақырып теңдік сұрататын» да осы ай.

(Соңы 3-бетте)



ЛЕБІЗ

МЕРЕЙТОЙ ҚҰТТЫ БОЛСЫН!

ҚҰРМЕТТІ ӨРІПТЕСТЕР

16 желтоқсанда біз баршамыз үшін ең қастерлі, ең қымбат мереке – Қазақстан Республикасы Тәуелсіздігінің 30 жылдығын атап өтеміз.

Ел тарихы мен ұлт тағдырына түбегейлі бетбұрыс жасаған бұл оқиғаның маңызы айрықша бағалы. Азаттықтың асқақ рухын сезінген еліміздің жаңа жылнамасы осы мерекеден басталады.

Сол сындарлы шақтың куәгері болу біздің ардагер судьяларымызға да бұйырды. Аға буын өкілдері қоғамдық-саяси құрылымдар мен дәуір өзгерген сәтте қол қусырып қарап отырмай, жаңа сот жүйесінің негізін қалады, тәуелсіз, қолжетімді, ашық сот қалыптастырудың тұңғырын бекітті. Бес жылдан кейін 1996 жылы желтоқсанда Қазақстан Республикасының Судьялар одағы қоғамдық бірлестігі құрылғанда осы судьялардың көпшілігі бірінші съездің делегаттары болды. Одақтың құрылуы тарихи маңызды оқиға, ол сот қауымдастығының бірлігін нығайтуға және сот саласын жаңғыртуға серпін берді. 25 жыл ішінде судьялардың өзін-өзі басқару органы сот қызметін және ұйымдастырушылық нысандарын жетілдіруге, судьялар съездерінде көтерілген барлық өзекті мәселелерді шешуге бағытталған өзгерістердің қозғаушы күшіне айналды. Оларды тәжірибе жүзіне енгізу сот жүйесін халықаралық стандарттарға жақындата отырып, оны өзгертті және нығайтты.

2021 жылы 8 қыркүйекте Қазақстан Судьялар одағының Халықаралық судьялар қауымдастығына кіргеніне он жыл толды. Мұны елдің сот жүйесінде орын алған объективті баға деуге болады. Бұл бүкіл судьялар қауымдастығының, барлық төрағалардың және Судьялар одағы қызметкерлерінің жылдар бойғы табанды да жемісті жұмысының нәтижесі.

Өмір өзгерістерден, жаңғыртулардан тұрады. Уақыт, жаңа технологиялық трендтер, заманауи үрдістер мен күрделі шындықтарды талап етеді. Талаптан шығу үшін судьялардың біртұтастығын сақтап, сот төрелігін іске асыруы, Жоғарғы Сот бастамашылық еткен жұмысқа белсенді қатысуы маңызды.

ҚҰРМЕТТІ ӨРІПТЕСТЕР!

Сот жүйесін жаңғырта отырып, біз негізгі міндет – азаматтардың құқықтары мен бостандықтарын сенімді әрі тиімді қорғау бағытындағы жұмыстың сапасын арттыруға ұмтыламыз. Бұл прогрессивті құқықтық институттарды, жаңа тәсілдерді қажет ететін көпөлшемді міндет. Алда әлі де көптеген жоспарлар мен биік мақсаттар тұр.

Сіздерді Тәуелсіздіктің 30 жылдық, Судьялар одағының 25 жылдық мерейтойымен құттықтай отырып, елімізге бейбітшілік, баршаңызға зор денсаулық, кәсіби табыс тілеймін! Игі істеріңізбен халықтың құрметіне бөлене беріңіздер!

Сәкен АБДОЛЛА,
ҚР Судьялар одағының төрағасы
Жоғарғы Соттың судьясы

СӘТІ ТҮСКЕН СҰХБАТ



Мұрат БАҚТИЯРҰЛЫ,
Парламент Сенатының депутаты:

«АЗАТТЫҚТЫ КЕШ АЛСАҚ ТА ЕШТЕҢЕДЕН ҰТЫЛҒАН ЖОҚПЫЗ»

– Мұрат Бақтиярұлы, бүгінде отыз жылдығы аталып өтіп жатқан Тәуелсіздігімізге жол салған – Желтоқсан оқиғасы. Бұл оқиға сіздің есіңізде қалай сақталды, сол кезде оның қазақ елінің тағдырын шешетін тарихи оқиға екенін сездіңіз бе?
– 1986 жылы Алматыдағы Қазақ мемлекеттік университетінің тарих факультетін бітіріп, Қызылорда қаласындағы институтта оқытушы болып жүрген едім. Жас маман ретінде жағалақанада тұрып жатқанбыз. Желтоқсан оқиғасы жайлы хабар бізге бір күн кешігіп жетті.

(Соңы 5-бетте)

ЖАҢҒЫРЫҚ

ЖЕЛТОҚСАН: БОДАНДЫҚҚА ҚАРСЫ БҰЛҚЫНЫС

АРАДА 35 ЖЫЛ ӨТСЕ ДЕ ЖЕЛТОҚСАНШЫЛАР СОЛ КЕЗДІ ӨЛІ КҮНГЕ КӨЗІНЕ ЖАС АЛЫП ОТЫРЫП ЕСКЕ АЛАДЫ. ОЛ КҮНДЕРДІ ТЕБІРЕНБЕЙ АЙТУ МҮМКІН ДЕ ЕМЕС. НЕГІЗІНЕН 17-30 ЖАС АРАЛЫҒЫНДАҒЫ ҚАЗАҚ ЖАСТАРЫНЫҢ НАМЫСШЫЛДЫҒЫН, РУХЫНЫҢ МЫҚТЫЛЫҒЫН ӨРТ СӨНДІРУ МАШИНАСЫНАН АТҚЫЛАҒАН СУ ДА, ҚАЛҚАНМЕН ҚОРҒАЛЫП, САПЕР КҮРЕГІМЕН ҚАРУЛАНҒАН ӘСКЕР КҮШІ ДЕ ҚАЙМЫҚТЫРА АЛМАДЫ. НАҒЫЗ ПАТРИОТТЫҚ ТӘРБИЕ ТЕК ТІЛДЕ ЕМЕС ЖҮРЕКТЕ, НАМЫС ПЕН ҚАЙРАТТА ЕКЕНІН КӨРСЕТЕ БІЛГЕН ЖАСТАРДЫҢ ЕРЛІГІН БҮГІНГІ ҰРПАҚҚА ҮЛГІ ЕТУ БІЗДІҢ БОРЫШЫМЫЗ. ОСЫ МАҚСАТПЕН БІЗ ДЕ БІРАЗ ЖЕЛТОҚСАНДЫҚТЫҢ ЕСТЕЛІГІН ОҚЫРМАН НАЗАРЫНА ҰСЫНЫП ОТЫРМЫЗ.

«Желтоқсан ақиқаты» республикалық қоғамдық бірлестігін құру идеясы 2007 жылдың 17 желтоқсан күні Алматы қаласындағы алаңнан бастау алды. Бірінші Құрылтай жиналысымыз 2008 жылы 27 мамырда Алматы қонақ үйінің конференц залында өтті. Оған еліміздің он облысынан желтоқсандықтар шақырылып, 105 делегат қатысты. Жиынға қаражат жағынан көмегін берген ҚР Парламент мәжілісінің депутаты, желтоқсаншы Нұртай Сабилянов еді. Ұйымды заңды тіркеуден өткізу үшін 2008 жылдың

тамыз айында Астана қаласына барып құжаттарын тапсырып, арызымызды тіркеттім. ҚР ӨМ Тіркеу комитеті ұйымды тіркеуден жеті рет бас тартты. Себебі, «Қоғамдық бірлестіктер» заңының талабы бойынша ұйым республикалық деңгейде жұмыс жүргізу үшін кемі сегіз облыстан филиал ашылу керек екен. Бір жыл жүгіріп жүріп қажетті филиалдары ашып, оның да құжатын дайындап Нұр-Сұлтан қаласына барып өткізгенімде, құжаттар түгел емес деп қайтарумен болды. Ақыры қайта-қайта барып жүріп, жетінші рет

дегенде ПҚ «Желтоқсан ақиқаты» РҚБ-сы 2009 жылдың 27 наурызында ресми тіркеуден өтті. Ол уақытта мен «Ұлтшылдар қозғалысы» Ұлт тағдыры республикалық қоғамдық бірлестігінің атқарушы директоры қызметін атқарып жүрдім.

Ұйымды құрудағы мақсат: 1986 жылы Желтоқсан көтерілісіне қатысқан азаматтардың құқығын қорғау; Желтоқсан көтерілісінің тарихи, саяси бағасын алу; құрбан болғандардың туған өлкесінде ескерткіш тұрғызу, оқыған мектебіне атын беру және мектеп оқулығына енгізу; желтоқсаншы батырларға Үкіметтен әлеуметтік жеңілдіктер талап ету; үй-күйі жоқтарға жер бергізу, жұмысқа орналастыру; ана тіліміздің мәртебесін қорғау.

2009 жылы Желтоқсан көтерілісінің батыры Қайрат Рысқұлбекке арнап Семей-Тараз шеруі ұйымдастырылды. Семейден Тараз қаласына дейін жастармен кездесіп Қайраттың ерлігі жайлы бейнефильм көрсеттік.

(Соңы 4-бетте)

ЖАСТАРДЫҢ ЕРЛІГІ ҚАШАН ӨЗ БАҒАСЫН АЛАДЫ?

Жомарт СИМТИКОВ, тарих ғылымының кандидаты, саяси ғылымдардың докторы:

– Өкінішке орай, биыл 35 жыл толғалы отырған 1986 жылғы жағдай әлі күнге өз бағасын ала алмай келеді. Қарапайым бұқараны айтпағанда, сол оқиғаның ішінде жүріп, соған тікелей араласқан адамдармен қатар осы мәселені зерттеген маман-ғалымдар арасында да бірұдай пікір жоқ. Тіпті, қоғамдық пікір қалыптастыратын гуманитарлық саладағы ғалымдар тарапынан 1986 жылғы желтоқсанды айтпағанда, 1916 жылғы көтерілістің өзі толықтай зерттеліп өз тарихи бағасын ала алған жоқ. Оны бір ғалымдар «Ұлттық көтеріліс» – деп айтудан қорқып, «Ұлт-азаттық революция» деп бағаласа, бір ғалымдар «Ұлт-азаттық соғысы» деп бағалап келеді. XX ғасырда коллективтендіру кездеріндегі 1929-31 жылдары болған, «Абыралы», «Созақ», «Адай», «Шұбартау» сияқты көтерілістер де жаңаша көзқараспен тарихи бағалануды қажет етеді.

Желтоқсанға қатысқан жастар мәселесінің 35 жылдығы қарсаңында тағы да көтерілуі заңды. Себебі, қайта түлеген тарих өзінің ақтандақ беттеріндегі таласты тұстарды қай кез болса да лықсытып, қоғамдық талқыға шығарады. Ендеше, желтоқсандықтар ерлігі қашан өз бағасын алады?

Әлия ТАУБАЕВА, тарихшы:

– 1990 жылдардың ортасында Алматыдағы жоғары оқу орындарының жастарынан құрылған Студенттік элита клубы 1986 жылғы желтоқсанда болған оқиға бойынша елімізде ең алғаш рет ғылыми конференция өткізген болатын. Сол кезде әл-Фараби атындағы ҚазҰУ-дың тарих факультетіндегі курстасым Жұлдыз Мақпұновамен бірге социологиялық сауалнама жүргізгенбіз. Сол зерттеу жұмысының нәтижесі бойынша желтоқсанда болған жағдай – қазақ қоғамында туындаған әлеуметтік наразылықтың көрінісі – деген баға бергенбіз. Содан бері менің тарихшы ретінде көзқарасым өзгерген жоқ. Кейін билік басындағылар оны «ұлт-азаттық көтеріліс» деген тұжырымға көтеруі ақиқатқа сай келетін дүние емес деп ойлаймын.

ОЙТАЛҚЫ

(Соңы 3-бетте)

